

# Program da giubileum da la LR: reussì e bain visità

■ (LR) La Lia Rumantscha ha festivà ses giubileum da 100 onns cun in festival da lingua e cultura a Zuoz en l'Engiadin'Ota. Dal 1. fin ils 18 d'avust han visità radund 5000 Rumantschas e Rumantschs sco era personas interessadas d'autras cuminanzas linguisticas il teater da giubileum «Tredeschin Retg» ed ils 11 dis tematics cun passa 80 puncts da program. La Lia Rumantscha è fitg cuntenta dal grond interess e dals blers resuns positivs.

La Lia Rumantscha ha vulì festivar ses anniversari da 100 onns ensemen cun la populaziun rumantscha e personas interessadas d'autras cuminanzas linguisticas – e quai è reussì. Radund 5000 visitadras e visitaders èn vegnids dal 1. fin ils 18 d'avust 2019 en l'Engiadin'Ota. Il Plazzet da Zuoz è sa transformà en in lieu d'inscunter e da barat. Era la bella aura ha contribuì a quest success.

## Grond success per il teater da giubileum «Tredeschin Retg»

In dals puncts culminants dal festival 100 onns Lia Rumantscha è stà il toc da teater «Tredeschin Retg» ch'è vegnì adaptà aposta per il giubileum. Il teater inscènà cun musica e saut ha giudì gronda popularitad. Pervia dal grond interess hai dà gist duas preschentaziuns supplementa-

ras. Las diesch represchentaziuns èn stadas vendidas ora cumplettaimain.

## 11 dis tematics – 11 differentas tempras

L'inscunter e l'ospitalitad èn stads en il center dal festival 100 onns Lia Rumantscha. Durant 11 dis tematics che han represchentà ils differents champs da lavur da la Lia Rumantscha ha gi lieu in viv barat – tranter las Rumantschas ed ils Rumantschs da las differentas valladas, da la diaspora sco era tranter las cuminanzas linguisticas dal Grischun e da la Svizra. Da prelecziuns, referats e discussiuns sur exposiziuns e lavuratori fin ad in pitschen turnier da ballape e concerts cun musica e chant da tut ils stils – ils passa 80 puncts da program han purschì insatge attractiv, interessant u nunspetgà per mintga gust e per mintga vegliadetgna. Gist il di da famiglia e la festa da 100 onns han mussà quant viv e multifar che la Rumantschia è.

## Trais constataziuns

1. Festivà è vegnì il giubileum da 100 onns, il focus n'era dentant betg sin il passà. Durant las trais emnas dal festival hai dà mintga di occurrenz che han drizzà l'egliada sin il futur. Las discussiuns cun participantas e visitaders èn adina stadas constructivas ed orientadas a



In dals puncts culminants dal festival 100 onns Lia Rumantscha è stà il teater «Tredeschin Retg» che è vegnì adaptà a posta per il giubileum.

FOTO M. WENDT

soluziuns – uschia era tar il tema rumantsch grischun ed idioms.

2. Il festival 100 onns Lia Rumantscha ha mussà che la Svizra stat davos las

Rumantschas ed ils Rumantschs. La solidaritad naziunala cun la Rumantschia è gronda. A la Lia Rumantscha èsi reussì da sensibilisar tut las parts dal pajais

per las particularitads e las sfidas en connex cun il rumantsch. Era sur ils cunfins naziunals or è vegnì rapportà da las festivitads.

3. La Rumantschia viva – quai è adina puspè stà evident durant las trais emnas dal festival. Il plaschair da discutir, da barattar opiniuns ed experientschas e da star en cumpagnia è ferm tar las Rumantschas ed ils Rumantschs. Igl è sa mussà che quai è per blers in basegn fundamental ed ina cumponenta decisiva per il mantegniment da la lingua e cultura rumantscha.

## Grazia

La Lia Rumantscha è conscianta ch'ina occurrenza da questa grondezza n'è betg realisabla senza l'agid da sponsurs e donatur. Betg mo la Confederaziun, il chantun Grischun e vischnancas grischunas han sustegnì l'occurrenza cun ina contribuziun finanziaria, mabain era tut ils auters 25 chantuns svizzers. In cordial grazia fitg va er a la Banca Chantunala Grischuna ed a la Ernst Göhner Stiftung.

In spezial engraziament merita la vischnanca da Zuoz che ha sustegnì l'organisaziun dal festival cun in comitè d'organisaziun local motivà ed engaschè.